

Trio's alle jaore

2011

Prins Jos 3 (Zanders) en zien adjudante
Marcel (Jeucken) en Roland (Valize)



Trio 2011:

Prins Jos III Zanders

Adjutant Marcel Jeucken

Adjutant Roland Valize

Vors: Boy Kolman

Veurzitter: Dick Lamboo

Lièfspreuk:

As ik dich zeen.

Geit de vastelaovend beginne

Dan kriège weej 't kald en werm van binne

4 x 11 zien hiël waat jaore

Want weej zien veur de vastelaovend gebaore

Maak daorum vuuël joeks, jen en plezeer

Want det zeen weej dreej zoeë gaer

Vastelaovend same...

Op dónderdaag 2 september geit 's aoves laat de tillefoon. Net gedouch nao eine lange slopende daag werke. Ik dach nog "krièg ik noow gaar gen rös vandaag!" Ózze vors aan de tillefoon, zoog ik op de mobiele. Vraemp vond ik det neet, want hae belt mich waal dökker euver raodszake. Maar genne Boy aan de tillefoon. Ózze veurzitter Dick melde zich namelijk aan de andere kant. Waat mótt dae noow met de tillefoon van Boy, dach ik nog. Daag Jos, zei hae en begós waat de praevele euver ein vergadering die zeej vanaovend belag hadde euver de take en verantwoordelikhede van de Chef de Protocol veur 't kómmende vastelaovessezoen. Ik waas 2 maond geleeje namelijk gevraag um 2^e Chef te waere. Ik dach nog: "waat eine kwats um mich daor euver te belle." Enfin, nao 't verhaol aangehuurd te hebbe, kwaam dan toch 't hoeëge woord d'r oèt: "Wils dich ózze nieje Hoeëghheid waere in 't jubileumjaor van de Wien. Ik hoofde daor neet lang euver na te dinke en zag meteen "jao, det wil ik." Ik had 't daor al ens dökker euver gehad met mien vruike Corina en det vond 't ouk good. Dick vraag mich nog of ik neet langer bedinktièd nuuëdig had? Nae det waas neet nuuëdig, zei ik um. De wuurs tenslotte toch maar eine kier gevraag, dach ik nog. Ik weit ouk al wae ik naeve mich wil hebbe staon, zag ik taeg Dick en vraag of of hae det al woel weite. Netuurlik woel ózze veurzitter det gaer huure. Ik zag um nog "ik weit neet of ózze vors noow bliej met mich is, maar ik heb gaer Marcel Jeucken en Roland Valize as mien adjudante." Nao ein paar daag belde Dick mich truuk um te vertelle det d'r "witte rouk" waas. Netuurlik had ik de letste daag al euver vuuël zake nao gedach, maar in groeëte liène wis ik waal



waat mich te wachte stond. Daonao de kinnismaakingsaovend wao al vuuël gelache en gedóld waort. Vanaaf det moment is ózze vastelaovend begós.

Dan mó't d'r netuurlik van alles gedaon en geregeld waere en det ging allemaol van ein leije daekske. Weej zien waal lang bezig gewaes um te bedinke op welke wies weej oèt meuste kómme. Det is neet zoè mekkelik asse alle dreej oèt de Raod van Elf kumps. Umdet dit ein jubileumjaor waas hebbe weej dreej jubileumprinse Hay I Maas, Lei I van Went en Lei II Knoops gevraog um in plaats van ós oèt te kómme. Gelökkig veur ós stumde zeej daorme in. Ein ander 'probleem' waas de Chef de Protocol. Umdet de 1^e en 2^e Chef de Protocol in 't trio zoote, waas 't de beurt aan de 3^e Chef de Protocol. Dae had daor netuurlik gaar neet op geraekend. Hae waas dan ouk zìer verras. Gelökkig haet hae alles good opgevange.

Waat hebbe weej geweldig moeije momente gehad. Hoeëgtepunte ware toch waal 't oètkómme op 't Prinsegala, de groeëte resepsie waor huuël vuuël familieleeje en vrinde aanwezig ware, de Prónkzitting en netuurlik de Blièrickse daag beej mich thoès. Ik had noeijs gedach det die allemaol beej mich in hoes zoele passe. Ózze buurt vónd 't ouk erg gezellig met Joekskapel Span Herres, die ein geweldig stökske meziek weg gaof.

Maar waat op mich de meiste indrök haet gemak, zien de zittingsaovende beej de Vorstenheuvel en de Seniore. Waat is 't geweldig um die minse te zeen geneete van 't programma det wuuërd aangebooije. En genaote hebbe weej ouk van alle evenemente waor ouk 't jeugtrio Prins Joey I Beerkens en zien adjudante Dimphy Leijssen en Laura Storm aanwezig ware. Same met 't jeugtrio, ózze vruikes Corina, Monique en Miriam en ózze blaage Selina, Loes, Pim en Kai hebbe weej jaor gehad um noeijs te vergaete! 't Waas altièd huuël gezellig en gereageld huuël laat in ós residensie; waor weej ontzettend vuuël gelache en lol gehad hebbe same.

Ik vond 't geweldig um prins beej de Wien te zien in 't jubileumjaor 2011.

Ald Prins Jos III

